

# A Me Tarra

Da issi piaghji fiuriti à i cimi altani  
Da u branu chì sbuccia à vaghjimu infiaratu  
Da i tempi landani à chi sarà dumani,  
Chì mai un cumpiessi di cantà u to fiatu  
O la me tarra.

Hè quidda di l'antichi à u visu in sudori  
Suminendu di granu i custeri è i piani,  
Arrizzendu i muri è quissa cun amori,  
Da fà chi ogni ghjornu ci sia casa è pani.

Hè quidda di u cummuni o tuttu hè à tutti,  
Da a donna, u ziteddu è u vechju malatu,  
A chì chjama à l'aiutu ci hè vinti mani ufferti,  
Spirendu chì dumani sarà forsi à un altru.

Hè quidda di u prisenti cridendu cun fervori  
Chì s'è pò campà quì ùn sò vani paroddi  
A quali vuleti dà un antru imperatori  
Edda rispondi sempri di u nome di Paoli  
O la me tarra.

Quidda di issu lucali chì cascava in pulvina  
L'omi si sò pisati pà fà fumà u forru  
Chi mai ùn fussi detta chì tuttu v'è in ruina  
Issu fumi hè da tutti l'ora di u ritornu.

Hè quidda di dumani francata da u mali  
Sarà à modu nostru è di vertu antichi  
Fora di i paradisi detti artificiali  
Chi l'eternu ci aiuti da vincia issi castichi.